

«Profitar duess tut la cultura»

Grischun: Lobi per la cultura

DA GION NUTEGN STGIER / ANR

■ **Dapli atenziun per la cultura vasta da noss chantun, dapli interess davart la politica per il mund da cultura grischun e cunzunt daplis daners per la cultura professionala e laica. Quai è l'intent da la lobi per cultura chi dat dapli intgins dis en il Grischun. Ier è ella sa drizzata a las medias.** Dapi intginas emnas vegn scrit bler e discurre savens da la revisiun totala da la lescha da cultura. La procedura da consultaziun da quella è a fin ed en la sessiun da favrer 2017 è quella in tractandum dal cussegl grond. Las personas che s'engaschan dapli intgins onns per in pli grond sustegn da la cultura davart dal chantun èn tut auter che ventiraivlas cun la nova lescha da cultura. Ussa vegnan las personas activas sin il champ cultural pli concretas ed han introducì ina lobi per la cultura grischuna. Cun ina petiziun, cun ina festa da cultura communabla e cun far attent a la gronda muntada da la cultura duessan la politica, la regenza e cunzunt er *Martin Jäger*, il minister da cultura, avair dapli chaipientscha per tut la cultura en noss chantun. La politica ed er la regenza duessan prender pli serius las pretensiuns da las personas che prestan cun la cultura bler per il socialesser, per la societad, per il turissem e per l'economia, è vegnì ditg ier a Cuir en la «Postremise».

«Tge fissan nus senza la cultura?»
La cultura saja da gronda valur per noss chantun, han ditg ier trais da las personas che fan part da la lobi per la cultura ed al comitè per la 1. Festa da cultura en noss



La cultura professionala, sco per exempel quella dad Origen...

FOTOS G. N. STGIER

chantun. *Andreas Leisinger*, il president da l'uniun che unescha ils 80 museums grischuns, ha menziunà che er per in museum saja da gronda impurtanza da pudair planisar per in temp pli lung. Cun ina garanzia finanziaria saja la planisaziun pli simpla, pli concreta e cunzunt er pli tgunsch realisabla. Leisinger ha ditg: «Tge fissan nus senza la cultura?»

Tuts prestan bler per la cultura

Giovanni Netzer, l'intendant da l'Origen Festival Cultural, er el è ina persuna impurtanta en quella lobi per cultura. El appellescha a la politica ed er a la regenza da prender pli serius ils giavischs da las personas activas sin il champ cultural. Cun

dapli daners, cunzunt er contribuziuns finanzialas a lunga vista, duessan tuts profitar, ha punctuà Netzer. «I dovra la cultura professionala, dentant er la cultura laica», ha menziunà il rescissur da teater ed anteriur purtader dal Premi cultural grischun. La furmaziun da teater professionala dovra la pitschna gruppa da teater da la vischnanca, in chor da vallada saja dad usch! gronda muntada sco in ensemble da chant da professiun ed ina musica da giuvenils fetschia ses pensum gist uschè bain sco in orchester da renum, ha ditg ier Giovanni Netzer als represchentants da las medias. El haja grond respect dad in sco l'auter che s'engaschia per la cultura en tut las regions da noss chantun



... ubain er la cultura laica, sco per exempel la Gruppa da teater da Mon Stierva, duessan profitar da meglras cundiziuns da basa da la nova lescha da cultura.

e mintgin merita in tschert respect per via da ses engaschi cultural.

Integrar er las personas da la cultura

L'iniziant principal da la lobi per cultura è *Nikolaus Schmid*, el che stat al timun da la Federaziun grischuna dal teater liber. Cun deliberar il cussegl grond in credit da basa saja ina tscherta cuntinuitad segira, saja quai per la cultura professionala ubain la cultura laica, ha ditg l'actor. La repartiziun dals daners da cultura duess vegnir reglada cun in concept, ella duess mintga quatter onns vegnir elavurada da la regenza e dals purtaders da la cultura e sissur duess ella vegnir approvada dal cussegl grond, punctuescha Schmid.

In comitè per la gronda festa

Ils 5 da schaner 2017 a las 18.00 cumenza en la sala dal cussegl grond la gronda festa da cultura. L'occurrènz è publica e da la partida vegnan ad esser artists ed artistas da tut las spartas da cultura. La finamira saja da mussar a la publicitad, dentant er a la politica, quant vasta che la cultura grischuna saja. Dal comitè da l'iniziativa da la festa fan part dasperas *Andreas Leisinger*, *Giovanni Netzer* e *Nikolaus Schmid* anc *Andy Kollegger*, *Karin Niederberger* e *Christof Rösch*.

Per suttascriver la petiziun vegn inditgà da far diever da la pagina digitala:
www.kulturlobby-gr.net